

**Uunga siunnersuut Meeqqanut suli atualinngitsunut perorsaanikkut
inerikkiartuutaasunik ulluunerani neqeroorutit pillugit Inatsisartut Inatsisaat
*Meeqqanut, Inuusuttunut, Ilinniartitaanermut, Kultureqarnermut Timersornermut
Ilageeqarnermullu Naalakkersuisumit saqqummiunneqartoq***

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneernejarneranut

ISUMALIUTISSIISUTAA

Ataatsimiititaliap sularinninnermini ilaasortarai:

Inatsisartunut ilaasortaq Najaaraq Møller, Siumut, siulittaasoq
Inatsisartunut ilaasortaq Emanuel Nûko, Naleraq, siulittaasup tullia
Inatsisartunut ilaasortaq Dines Mikaelen, Siumut
Inatsisartunut ilaasortaq Mariia Simonsen, Inuit Ataqtigiit
Inatsisartunut ilaasortaq Eqaluk Høegh, Inuit Ataqtigiit

UKA2023-mi ulloq 3. oktober 2023 siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Tamakkiisumik naalakkersuinikkut anguniakkat Naalakkersuisut suleqatigiinnissamut
isumaqatigiissutaanni, Inuuneritta III-mi – Naalakkersuisut meeqqat inuunerissut pillugit
suleqatigiinnissamik periusissiaa 2020-2030-mi aamma Naalagaaffiit Peqatigiit Meeqqat
pisinnaatitaaffii pillugit Isumaqtigiissutaat, tunulequtaralugit matumani inatsisissatut
siunnersuut saqqummiunneqarpoq. Siunnersuut suli atualernejanngitsunut eqaannerusumik
inatsiseqalernissaata qulakkeernejanngitsaanik siunertaqarpoq, tassani ilaatigut meeqqat
inuusuttullu pillugit suliassaqarfimmi qitiusumik suliqaqtut suliniutinut aallartisarnejartunut
atatillugu piginnittuunissaat isiginiarneqarluni. Tamatuma saniatigut Inatsisartut inatsisaata
atuuttup atuutilersinneqarnerata kingorna allannguisoqarnissaanut tunngaviusumik
pisariaqartinneqartut naammassineqarnissaat siunnersuummi siunertarineqarpoq. Tamatuma
saniatigut meeqqat immikkut pisariaqartitallit eqqarsaatigalugit siusissukkut
iliuuseqartarnissap pisariaqassusaanik ersersitsinissaq siunnersuummi siunertaavoq.

Siunnersuutip Inatsisartuni siullermeerneqarnera

Inatsisissatut siunnersuut siullermeerinninnermi tigulluarneqarpoq, ataatsimiititaliamilu suliassanngorlugu innersuunneqarluni.

Meeqqat atugassarisaasa pisinnaatitaaffiisalu qulakkeerneqarnissaat pingaaruteqartoq siullermeerinninnermi immikkut ittumik aallunneqarpoq, kiisalu meeqqat ataasiakkaat suut pisariaqartitarineraat ukkatarissallugu aamma pingaaruteqartoq, tassunga ilanngullugu meeqqeriviit tassaasariaqartut meeqqat suliassatigut isumaginninnikkullu ineriartorfigninnaasaat.

Tamatuma saniatigut suliassaqarfimmi tamatumani "assaak kissalaartut"-nik taagorneqartut annertuumik amigaataanerak oqallinnermi eqqartorneqarpoq, tamannalu naalackersuinikkut annertuumik sammeneqarpoq.

Tusarniaanermi akissutit

Inatsisissatut siunnersuut tusarniaanermi illuatungeriinnut attuumassutilinnut nassiunneqarnikuuvoq ullunilu 31. marts 2023-mit ulloq 5. maj 2023 pisortatigoortumik tusarniaassutigineqarsimalluni. Tusarniaanermi akissutigineqartut oqaaseqaatitaalu inatsisissatut siunnersuummut kakkiunneqarput, tamanna Inatsisartut Siulittaasoqarfiata ilusiliinissamut piumasaqaataanut naapertuuppoq.

Tusarniaanermut akissutit ataasiakkaat Naalackersuisunit kinguneqarluartumik isummerfigineqarlutillu, taakku ilarpassui tusaatissatut tiguneqarput. Tamanna tunngavigalugu pisariaqarneratut annertussuseqartumik iluarsiiisutit siunnersuummut ilanngunneqarput.

Inatsisilerinikkut misissorneqarnera

Inatsisilerinikkut misissuisoqarnissaa ataatsimiititaliamit kissaatigineqarpoq, siunnersuummi aalajangersakkat arlallit qanoq paasineqarnissaannut kingunerisassaannullu immikkut ittumik apeqquteqarmat. Ataatsimiititaliap apeqqutai ilanngussaq 1-imi takuneqarsinnaapput.

Ataatsimiititaliap siunnersuummik suliarinninnera

Meeqqanut suli atualinngitsunut inatsit ullutsinnut naapertuunnerusoq eqaannerusorlu qulakkeerniarlugu Inatsisissatut siunnersuummi siunertaasoq ataatsimiititaliamit maluginiarneqarpoq, tassani Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut Inatsisaata¹ atuutilernerata kingorna allannguisoqarnissaanik pisariaqartitat paasineqartut tunngavigalugit siunnersuut saqqummiunneqarsimammat.

¹ Allannguinissamut pisariaqartitsinerit ilaatigut naalackersuinikkut anguniakkat pingaarnerit, meeqqat pisinnaatitaaffii pillugit Naalagaaffiit Peqatigiit isumaqatigiissutaat, aamma misissuineq 2022-imi ingerlanneqartumi inernerinik aallaaveqarput.

Suliniutit aallartinneqarsimasut eqqarsaatigalugit meeqqanut inuusuttunullu immikkoortortani qitiusumi suliaqartut annertunerusumik piginnittuutinneqarnissaat siunnersuutip nassatarissavaa. Kommunini susasaqartunut tamanna pitsanngoriaataasussatut ataatsimiititaliamit isigineqarpoq, taakkua assersuutigalugu utaqquisut allattorsimaffiinit piunasaqaatinik aalajangersaanissamat sinaakkutissat pitsaaneruset pigilissammattigit. Ajunngitsumik pitsanngoriaateqartoqarsimanera pineqartoq kommuninit isumaqataaffigineqartoq tusarniaanermi kommunit akissuteqaataanni allassimasoq ataatsimiititaliap maluginiarpa.

Kiisalu meeqqanut immikkut pisariaqartitsisunut siusissukkat suliniuteqartarnissap pisariaqarnera inatsisissatut siunnersuutikkut erseqqissarneqarpoq, taamaaliornikkut meeqqat tamarmik sapinngisamik assigiimmik periarfissaqarsinnaaqqullugit, taamaalillunilu innarluuteqarnerup sivisuumik sunniuteqarsinnaanera kingunerluuteqarsinnaaneralu imaluunniit allatigut piginnaanikillisinnaanerup minnerpaaffianiitinneqarsinnaaqqullugu.

Inissamik innersuussisarnermut tunngatillugu siunnersuummilu § 10-p aalajangersakkatut nutaatut paasineqarnissaa pillugu siullermeerinninnermut atatillugu eqeersimaartumik oqallittoqarnera ataatsimiititaliamit maluginiarneqarpoq. Angajoqqaat arlalinnik imaluunniit assersuutigalugu marluliaatillit pineqartillugit aalajangersagaq qanoq paasineqassanersoq oqallinnermi nalornissutigineqarpoq. Taamaattumik aalajangersakkat matumunngalu oqaaseqaatit ataatsimiititaliap sukumiisumik atuarpai. Matumani allassimavoq, meeraq ataaseq inissamat ataatsimut innersuuneqartartoq. Taamaalilluni meeraq ataaseq ulluunerani paaqqinnittarfimmut ataasiinnarmut allatsissinnaavoq. Ilaqutariinni arlalinnik meerartalinni (matumani marlulissat ilanngullugit) suli meeqqamut ataatsimut innersuussisoqartassaaq, aalajangersagarlu ilaqutariinnut arlalinnik meerartalinnut taamaalilluni killilersuisuunngilaq. Taamaattumik § 10-mut tunngatillugu annertunerusumik oqaaseqarnissamat tunngavissaqanngitsoq ataatsimiititaliaq isumaqarpoq.

Siunnersuutip oqaasertalersorneqarnera ataatsimiititaliamit misissorneqarpoq siunnersuutillu kalaallisua annertunerusumik misissorneqarsimarpasinngitsoq maluginiarlugu. Inatsimmi siuliani siunnersuummilu matumani taaguutit atorneqartut ilaat assigiinngissuseqarput, soorlu inatsisissatut siunnersuummi pineqartumi oqaaseqaatinilu taaguutit atorneqartut assigiinngissuseqartut.

§ 2-mi imm. 7 oqaasertaliussa qariartaaserlu ”Inooqataanikkut kingornuttakkat pitsaanngitsut”, kiisalu qariartaatsip taasuma meeqqanut pineqartunut pisariaqanngitsumik naqissusiinermik qanoq nassataqarsinnaanera pillugu ataatsimiititaliamit sukumiisumik oqaluuserineqarpoq. Siunnersuummik inatsisitigut misissuinnermut atatillugu meeqqat inuuniarnikkut ajornartorsiuteqartut immikkut eqqumaffigineqarnissaasa qulakkeerneqarnissaa aammalu siusissukkat iliuseqartarnissap qulakkeerneqarnissaa siunertaasoq

Naalackersuisunit ilisimatitsissutigineqarpoq.

Inooqataanikkut kingornuttakkat pitsaanngitsut tassaapput, angajoqqaat pitsaanngitsumik pissusilersortarnerat inuuniarnikkullu inissisimanerlunnerup kingornunneqartarnera. Assersuutigalugu appassissumik ilinniagaqarsimaneq, suliffissaaleqineq, pinerluuteqartarneq imaluunniit imigassamik allanilluunniit atonerluinermik ajornartorsiutit peqqutaasinnaapput. Pitsaanngitsumik pissusilersuutit kingornunneqakkajuttarput, angajoqqaat meeqqaminnik ikiuisinnaanginnerat peqqutaalluni. Taamaalillunilu inooqataanikkut kingornuttakkat pitsaanngitsut peqqutaallutik inuit ataasiakkaat periarfissaat annikinnerusarlutik.

Taamaattumik meeqqat taakku eqqumaniarfigineqarnerunissaat iluaqutaasinnaavoq, taamaaliornikkut siusissukkut meeraq ilaqutariillu ikiorserniarlugit suliniutinik aallartitsisoqarsinnaaqullugu. Taamaalilluni meeraq inooqataanikkut kingornuttakkanik pitsaanngitsunik aqusaagaqannginnissaanik ikiorniarneqarnissaa siunertaavoq taamaalillunilu meeqqat tamarmik qanoq tunuliaqutaqarnerat apeqqutaatinnagu assigiimmik periarfissinneqarnissaa qulakkearniarneqarluni. Akerlianik tamanna ima nassataqarsinnaavoq, meeraq pitsaanngitsumik atugaqartuunini peqqutigalugu "immikkoortitatut" inissinneqarnissaa. Taamaaliornikkut meeraq navianartumut inissinneqarsinnaavoq, pisariaqanngitsumillu pitsaanngitsumik naqissuserneqarluni.

Tassunga atatillugu inatsimmi oqaatsit sapinngisamik assigiiartut atorneqarnissaa ataatsimiititaliamit kissaatigineqarpoq. Taamaattumik meeqqat tapersorneqarnissaanut Inatsisartut inatsisaannut nr. 20-mut, 26. juni 2017-imeersumut sanilliussisoqarpoq. Inatsimmi tassani § 1-ip oqaasiliornerini oqariaaseq "inooqataanikkut kingornuttakkat pitsaanngitsut" atorneqanngimmat ataatsimiititaliamit maluginiarneqarpoq.

Meeqqanik pinerliisimannginnermut uppersaatinik piunasaqaateqartussaataaneq pillugu Inatsisartut inatsisaata allangortinnera pillugu Inatsisartut inatsisaannut nr. 23-mut, 25. november 2022²-meersumut nassuiaatini ima allassimasoqartoq ataatsimiititaliamit maluginiarneqarpoq, tassalu Inatsisartut inatsisaat inuit meeqqanik pinerliisimannginnermut uppersaammik pillagaasimasutut nalunaarsorneqartut atorfinitsinneqannginnissaat sulilersinneqannginnissaalluunniit toqqaannartumik inerteqqutigineqanngilaq, taamaallaali paasisaqarluarsimalluni aalajangiinissaq tunngavissinneqarluni. Tamatuma akerlianik pineqaatissinneqarsimanermut uppersaateqartoqarpat meeqqamulluunniit pinerliisoqarsimappat³ atorfinitsitsinissamut ulluuneranilu angerlarsimaffimmik akuersissuteqarnissamut toqqaannartumik inerteqqummik inatsisissatut siunnersuut una periarfissiivoq. Tamanna ataatsimiititaliamit ima paasineqarpoq nalinginnaasumik maleruagassat pingaarnertut inatsimmi⁴ kisimik maleruagassiorneqartut, immikkullu

² Uunga inatsisikkut peqqummut nassuiaatini 16. august 2022-meersuni qupperneq 3: Meeqqanik pinerliisimannginnermut uppersaatinik piunasaqaateqartussaataaneq pillugu Inatsisartut inatsisaata allangortinnera pillugu Inatsisartut inatsisaat. UKA 2022/117-ikkut oqaluuserineqartoq

³ Tak. §§ 18, stk. 3 kiisalu 26, imm. 3

⁴ Inatsit nr. 23, 25. november 2022-meersoq

inatsimmi, soorlu inatsisissatut siunnersuummi matumani, sakkortunerulersitsinissamut inatsisitigut tunngavissaqartoq. Taamaattumik §§ 18, imm. 3-mi kiisalu 26, imm. 3-mi atorfinitsitsinissamut/akuersinissamut inertequtit inatsisinut atuuttunut naapertuupput.

Meeqqanut pinerliisimannginnermik uppersaammik pinerluuteqarsimannginnermullu uppersaammik pissarsiniarnermi aalajangersakkani oqaasertaliussat itinerusumik ataatsimiititaliamit eqqartorneqarput, tak. §§ 18, imm. 3 aamma 26, imm. 3. Tassani allassimavoq, ukiunut tallimanut kingullernut pinerluuteqarsimannginnermut uppersaammik kiisalu meeqqanut pinerliisimannginnermik uppersaammik ukiunut kingullernut qulinut pissarsiniartoqassasoq, tamanna maannakkut malittarisassanut sanilliullugu sakkortuseriarneruvoq. Meeqqamut pitsaanerpaaq anguniarlugu aallussinerulernissap qulakkeerneqarnissaa ataatsimiititaliamit kissaatigineqarpoq, taamaattumillu aalajangersagaq naammannersoq imaluunniit sakkortunerulersitsisoqassannersoq oqaluseralugu, taamaaliornikkut pinerliisimannginnermut uppersaammik ukiunik qulinik kingumut pissarsiniartoqarsinnaaleqqullugu.

Tassunga atatillugu pinerluuteqarsimannginnermut uppersaatiip meeqqanullu pinerliisimannginnermik uppersaatiip assigiinngissusaat tassaavoq meeqqanut pinerliisimannginnermik uppersaammi meeqqanut unioqquitsinerit taamaallaat pineqarlutik. Tamatuma saniatigut pinerluuteqarsimannginnermut uppersaammi inersimasunut unioqquitsinerit aamma pineqarput. Assersuutigalugu meeqqamik pinngitsaaliilluni atoqateqarsimaneq pinerluuteqarsimannginnermut uppersaammi kiisalu meeqqanut pinerliisimannginnermik uppersaammi allassimassaaq, inersimasumik pinngitsaaliilluni atoqateqarsimaneq pinerluuteqarsimannginnermut uppersaammi taamaallaat allassimassalluni.

Pinerluuteqarsimannginnermut uppersaatinik pissarsinissamut aalajangersakkat ukiunut qulinut sakkortusineqarnissaannik tikkuussivoq, taamaaliornikkullu inersimasunut kinguaassiutitigut pinerluuteqartoqarsimannersoq pillugu annertunerusumik paasisaqartoqarsinnaalerluni. Naak inersimasunut pinerliinerit pineqaraluartut meeqqap ajunnginnerpaamik pineqarnissaanut tamanna qulakkeerinnittuusinnaavoq, pinerluuteqarsimannginnermut allagartami kinguaassiutitigut naapertuutinngitsumik pissusilersuuteqartoqarsimaneq takuneqarsinnaammat. Taamaalilluni pineqartut ukiut tallimat-qulit kingulliit taamatut pinerluuteqarsimappat ulluunerani paaqqinnittarfinni ulluuneraniluunniit angerlarsimaffinni paarsisartuni suleqqusaajunnaarsinnaapput. Taamatuttaaq meeqqanut pinerluuteqarsimannginnermut uppersaammi kinguaassiutitigut pinerluuteqarsimanagerit⁵ taamaallaat pineqarnissaasa sakkortusineqarnissaannik tikkuussivoq, pinerluuteqarsimannginnermut uppersaammi inunnut ulorianartorsiortitsisumik pinerliisimanernik soorlu nakuusernerit aamma pineqartut. Meeqqamut

⁵ Kiisalu immikkut ittumik ukioqquitsinerit pinerliiniartarnermut tunngassutillit

nakuusertoqarsimatillugu tamanna pinerluuteqarsimannginnermut uppersarsaammi taamaallaat allassimassaaq meeqqanut pinerliisimannginnermut uppersarsaammi allassimanani, taamaattumillu aalajangersakkat sakkortusineqarnissaat pissusissamisoorpoq taamaaliornikkut paasissutissanik ukiuni qulini kingumut aallertoqarsinnaassalluni.

Illuatungaatigut uppersarsaatit taakkua marluk qaleriittoorsimasinnaanerit sakkortusisitsinissap akerlianik tikkuussivoq. Meeqqanut kinguaassiutitigut atornerluisimanerit uppersarsaatini marluusuni allassimalissapput, taamaattumik ukiuni qulini meeqqanut pinerliisimannginnermut uppersarsaammut unioqquutitsisimaneq ilaatinneqalissalluni, naak ukiunut tallimanut pinerluuteqarsimannginnermut uppersarsaat unioqquutitsisimanerit kingumut naammangikkaluartoq. Tamatuma saniatigut inersimasunut pinerluuteqarsimanerit meeqqanullu pinerluuteqarsimanerit imminnut attuumassuteqartinnissaat pisariaqangilaq. Taamaattumik inuit meeqqanik ulorianartorsioritsinissaminut ilimanangitsut mattunneqaratarsinnaapput.

Taamatuttaaq ulluunerani paaqqinnittarfinni imaluunniit ulluunerani angerlarsimaffinni paaqqinnittarfiusuni sulisussaaleqiffioreersuni atorfinnut qinnuteqartut arlalippassuit mattunneqarnissaannik sakkortusisitsinissamut akerliuvoq.

§§ 18, imm. 3-p aammalu 26, imm. 3-p oqaasertaliorneri pillugit oqallinnerni ataatsimiititaliamit eqqumiigineqarpoq meeqqanik pinerliisimannginnermik uppersarsaatit meeqqanut kinguaassiutitigut kannguttaatsuliornerit inummullu navianaatilimmik pinerluuteqarnerit pillugit paasissutissanik imaqartut oqaaseqatigiit aappaanni takuneqarsinnaammat. Taamaalluni meeqqanik pinerliisimannginnermik uppersarsaatit ataatsimiititaliamit ima paasineqarput, taakkunani kinguaassiuutitigut kannguttaatsuliornerit kisimik pineqartut⁶.

Aammattaaq §§ 18, imm. 3-mi aamma § 26, imm. 3-mi oqaasertaliornerit inatsit nr. 23-mut, 25. november 2022⁷-meersumut ataatsimiititaliap sanilliuppai. Inatsimmut nassuiaatini⁸ allassimavoq, meeqqanut kinguaassiuutitigut peqqarniitsuliorsimaneq pillugu meeqqanut pinerliisimannginnermik uppersarsaatini paasissutissat aatsaat nunguterneqarsinnaasut inatsisinik unioqquutitsisisoq 80-inik ukioqalereeraangat. Tamanna ataatsimiititaliamit ima paasineqarpoq meeqqat atugaat ima pingaartinneqartigisut atorfinitsitsisussatut oqartussaasoq atorfinitsitsinnginnissamut paasissutissatigut tunngavissanik periarfissaqarnissamullu qulakkeerunneqassalluni pinerluuteqarnerit pisoqqat pineqaraluarpataluunniit.

Inatsisissatut siunnersuummut matumunnga sanilliullugu §§ 18, imm. 3-mi aamma 26, imm. 3-

⁶ Kiisalu peqqarniisaarniarneq pillugu immikkut unioqquutitsinerit

⁷ Meeqqanik pinerliisimannginnermut uppersarsaatinik piomasaaqateqartussaataaneq pillugu Inatsisartut inatsisaata allangortinneqarnera kiisalu tassunga nassuiaatit pillugit

⁸ Uunga inatsisikkut peqqummut nassuiaatini 16. august 2022-meersuni qupperneq 5: Meeqqanik pinerliisimannginnermut uppersarsaatinik piomasaaqateqartussaataaneq pillugu Inatsisartut inatsisaata allangortinnera pillugu Inatsisartut inatsisaat. UKA 2022/117-ikkut oqaluserineqartoq

mi oqaasertaliernerit, pingaarnertut inatsisip siunertarisaanut paatsoorutaasinnaallutilluunniit siunertarinagu annikillisisinnaasut ataatsimiititaliaq isumaqarpoq, inuup ukiut kingulliit qulit iluanni meeqqanut pinerliisimanermut eqqartuunneqarsimanera meeqqanik pinerliisimannginnermut uppernarsaammi allassimappat inuk atorfinitsinneqarnissaminut itigartinneqassasoq aalajangersakkat oqaasertaanni takuneqarsinnaammat. Taamaalilluni oqaasertat malillugit eqqartuussutit ukiunit qulinit pisoqaanerit atorfinitsitsisussatut oqartussaasup naliliinissaanut attuumassuteqarsorinangillat.

Assersuutigalugu angut 30-nik ukioqarluni meeqqamik pinngitsaaliisimasutut eqqartuunneqaruni tamanna 80-inik ukioqalernissaata tungaanut meeqqanik pinerliisimannginnermik uppernarsaataani allassimassaaq. Taamaattorli 41-nik ukioqarluni ulluunerani paaqqinniffimmi atorfininniarluni qinnuteqaraanni kingullermik eqqartuunneqarsimaneq ukiut qulit sinnerlugit pisoqaassuseqassaaq, taamaattumillu oqaasertat malillugit atorfinitsinneqarnissaminut mattunneqarsinnaanani.

Pinerluuteqarnerit pinerluuteqartup 80-inik ukioqalernissaata tungaanut meeqqanik pinerliisimannginnermik uppernarsaataani allassimanissaannik inatsisiliortut siunertarisaannut tamananna annikillisitsoq ataatsimiititaliaq isumaqarpoq.

Siunnersuutip aningaasatigut kingunerisassai

Siunnersuutip piviusunngortinnerani aningaasatigut kingunerisassai siunnersuutip nalinginnaasumik oqaaseqaataani allassimapput. Tassani ima allassimavoq siunnersuut pisortanut aningaasatigut kinguneqarnissaa naatsorsuutigineqanngitsoq, akerlianilli allaffissornikkut ataasiakkaatigut sipaaruteqarfigineqarsinnaasoq, ilaatigut kommunalbestyrelsi meeqqanut suli atualinngitsunut utaqqisunut allattorsimaffimmut piumasaqaatinik nammineq aalajangersaanissaanut pisinnaatileratigut.

Inuussutissarsiortunut namminersortunut imaluunniit innuttaasunut aningaasatigut imaluunniit allaffissornikkut siunnersuut kinguneqarnaviannngitsoq ilanngullugu allassimavoq.

Ataatsimiititaliaq tamatumunnga oqaaseqaatissaqanngilaq.

Ataatsimiititaliap inassuteqaatai

- Matuma kinguliani taaneqartutut Naalakkersuisut allannguutissatut siunnersuummik saqqummiussinissaannik ataatsimiititaliap isumaqatigiittup kaammattuutaata Naalakkersuisunit malinneqarnissaa naatsorsuutigalugu siunnersuut akuersissutigineqassasoq **ataatsimiititaliap isumaqatigiittup inassutigaa.**
- Ataatsimiititaliap isumaqatigiittup inatsisissatut siunnersuutip kalaallisuuata oqaasertalerneqarnerata misissorneqarnissaa Naalakkersuisunut **kaammattuutigaa**
- Ataatsimiititaliap isumaqatigiittup siunnersuutigineqartumi § 2 imm. 7 ima oqaasertalerneqassasoq Naalakkersuisunut **kaammattuutigaa:**

“Piffinni tamani peqataatinneqarneq qulakkeersimaneqassaaq, perorsaanermik neqeroorutit kommunimi meeqqanut nalinginnaasumik ataatsimut neqeroorutaatinnerisigut meeqqanullu, inuuniarnermikkut ajornartorsiuteqartunut imaluunniit immikkut pisariaqartitsisunut, immikkut iliuuseqarnissamik pisariaqartitsisunut pinaveersaartitsinernut ikorfartuisumillu iliuuseqarnernut piareersimatitaqarneq ilanngullugu”.

- Pinerluuteqarsimannginnermik uppersaammik piniartarneq pillugu § 18, imm. 3-mi oqaaseqatigiinni siullerni kiisalu § 26, imm. 3-mi oqaaseqatigiinni siullerni oqaasertat allanngortinneqarnissaannik Naalakkersuisut ataatsimiititaliamit isumaqatigiittumit **kaammattorneqarput**, taamaalilluni aalangersakkat ukiunit tallimanit ukiunut qulinut sukannernerulersillugit.
- §§ 18, imm. 3-mi oqaaseqatigiit aappaanni kiisalu § 26, imm. 3-mi oqaaseqatigiit aappaanni oqaatigineqartutut meeqqanik pinerliisimannginnermik uppersaatit inummut navianaatilimmik pinerluuteqarsimanerit pillugit paasissutisssanik imaqarnersut, taamaassimappallu tamanna inatsisikkut sorlikkut atuutsinneqarnerisq erseqqissaqqullugu Naalakkersuisut ataatsimiititaliamit isumaqatigiittumit **kaammattorneqarput**. Taamaassimanngippat aalajangersakkat oqaasertaasa kingunerisassaannik iluarseeqqullugit Naalakkersuisut kaammattorneqarput.
- § 18, imm. 3-mi oqaaseqatigiit aappaanni oqaasertat (inummut navianaatilimmik pinerluuteqarsimanerit pillugit siuliani allassimasut eqqarsaatigalugit) allanngorteqqullugit Naalakkersuisut ataatsimiititaliamit isumaqatigiittumit **kaammattorneqarput:**

- ”Meeqqanut pinerliisimanginnermik uppersaammik takuneqarsinnaappat, qinnuteqartoq kinguaassiutigut kannagtaatsuliorsimasutut imaluunniit inummut navianaatilimmik pinerluuteqarsimasutut eqqartuunneqarsimappat”.
- § 26, imm. 3-mi oqaaseqatigiit aappaanni oqaasertat (inummut navianaatilimmik pinerluuteqarsimanerit pillugit siuliani allassimasut eqqarsaatigalugit) allanngorteqqullugit Naalakkersuisut ataatsimiititaliamit isumaqatigiittumit kaammattorneqarput:
 - ”Angerlarsimaffimmi paarsisartup taassumaluunniit inoqutaasa ilaasa meeqqanut pinerliisimanginnermik uppersaataanni takuneqarsinnaappat, pineqartoq ilaqutariissutsip iluani pinerluuteqarsimasutut, kinguaassiutigut kannagtaatsuliorsimasutut imaluunniit inummut navianaatilimmik pinerluuteqarsimasutut eqqartuunneqarsimappat, imaluunniit”.
- Immikkoortup pingajussaaneerseqannginnerani ataatsimiititaliamut innersuussutigeqqinneqarnissaa ataatsimiititaliap **qinnutigaa**

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappasaaniigassanngortippaa.

Najaaraq Møller
Siumut
Siulittaasoq

Emanuel Nûko
Naleraq
Siulittaasup tullia

Dines Mikaelson
Siumut

Mariia Simonsen
Inuit Ataqtigiit

Eqaluk Høegh
Inuit Ataqtigiit
